

Donostiako Diputazio Jauregian, 1981.eko Uztailaren 24ean, Euskaltzaindiak arratsaldeko 4etan hasi du bere hileroko batzarra. Bildu dira: L. Villasante buru, J. Haritschelhar buruordea, P. Altuna, J. L. Davant, A. Irigoyen, F. Krutwig, P. Lafitte, E. Larre eta P. Ondarra euskaltzain jaunak, goizeko bilkuran J. San Martin ere egon da, baina arratsalderako bere ezin etorria adierazi du; N. Alzola Gerediaga, J. A. Arana, M. Atxaga, P. Charritton, J. G. Etxebarria, E. Etxezarreta, J. Goikoetxea Maiza, J. Intxausti, J. M.<sup>a</sup> Lekuona, J. A. Letamendia, J. L. Lizundia, J. A. Loidi, A. Zatarain eta J. J. Zearreta euskaltzain urgazleak.

X. Diharce, J. Hiriart-Urruty, P. Larzabal eta J. M.<sup>a</sup> Satrustegi jaunak ezin etorria adierazi dute.

Ohi den otoitzarekin hasi da batzarra.

Maiatzeko eta Ekaineko batzar agiriak onartu dira.

Agustin Anabitarte eta Philippe Aranart euskaltzain urgazleen hil berriak eman dira.

## GOIZEKO BILKURAREN BERRI

Euskaltzain osoek, goizean, egindako bilkuran erabilitako gaietatik, honako hauek azpimarratu dira arratsaldeko batzarrean:

1. *Euskararen Irakasle Titulua* dela eta Zuzendaritzak hartutako erabakia hobeto zehazten da eta beraz, ikasturtea hersteke azken egunetan, alegia, Irailaren ondarrean egingo dira azken etsaminak, Euskal Komunitate Autonomo eta Iparralderako. Irakaslego batzordea Irailaren lehenengoetan bilduko da eta bere esku uzten da non eta noiz egingo diren etsaminak erabakitzea eta iragartzea.

Irigoyen euskaltzainak, batzorde burua den aldetik, bere kexua agertu du arazo honi eman zaion prozeduraz, hain zuzen ere erabakiaren berri batzordeko idazkariak taldeko guztiei bidali dien Euskaltzaindiko idazkariaren karta batez izan baitu.

2. *Alfabetatze Euskalduntze Koordinakundeko* arduradunekin, Gasteizen Ekainean egindako bileraren ondotik, Zuzendaritzak hartutako erabakiaren berri izan du goizeko bilkurak. Beraz, birretsita gelditzen da A. E. K.ek bere gain hartzen dutela, hemendik aurrera, bere eginkizun guztien erantzunkizun osoa, Euskaltzaindiaren orain arteko babesik gabe.

3. *Itzultzaile Eskola*. J. San Martin Jagon Sailburuak, Itzultzaile Eskola, Jaur-laritzaren, Euskal Gobernuaren Kultur Kontseilaritzara pasatzen dela konitu eman du, datorren ikasturtetik hasita.

4. *Bibliotekako Erregela Bereziak*. Azkue Bibliotekaren batzordeak aurkeztu du Bere Erregela Berezien projektua. Irailaren 25erarte, beraz, batzar egunerarte irekitzen da ohar, gehigarri edo aldaketak egiteko zuzenketa epea. Batzar horretan onartzen bada, Arautegi eta Barne Erregelekin batera argitaratzea nahi da.

### BATZORDEEN AZALPENA

*“Euskera” eta Argitalpen* batzordea bildu da, goizean, euskaltzainekin batera eta bere berri L. Villasante Batzorde buruak eta R. Badiola Batzorde eragileak eman dute. Hurrengo *“Euskera”*ren zerbakia nola tajutuko den erabaki da, banan-banan txosten eta beste lanak aztertu eta zehaztuaz. Nazioarteko Euskalarien Jardunaldietako liburuaren argitalpena nola dagoen ere ikusi da. Euskaltzaindiaren Arautegi eta Barne Erregelak, nola argitaratu zehaztu da. Sakeleko edizio formato bat aukeratu da eta 1.000 ale aterako dira.

*Dialektologi* batzordearen berri J. A. Letamendia idazkariak ematen du. Iparraldean egin zen inkesten plangintza eta lana berrikusi da. A Irigoyenek, morfosintasiak erabili izan duen 86 galderatako galdekizuna jaso da eta J. A. Letamendiak, gorputzaren inguruko 250 hitzen zerrenda ere bai. Inkesta lekuak hautatzeko, Ch. Videgain arduratuko da, Iparraldean; A. Ondarra, Nafarroa Garaian eta J. M.<sup>a</sup> Etxebarria, Araba, Bizkaia eta Gipuzkoan.

### BATZAR TXOSTENAK

*Esaerak eta Durangaldeko euskara* izeneko txostena irakurri du N. Alzola Gerediaga jaunak. Egileak eskaturik, zenbait eranskin egiten dizkio J. L. Lizundiak. Beste zenbait eritzi ere jaso dira.

*Non Ziburuko Etxeberringan* deituriko txostena irakurtzen du P. Altuna jaunak. Ondorengo elkarriketan hainbat ohar jakingarri agertu dira.

Eta besterik gabe amaitu da batzarra.

*Euskaltzainburua*

*L. Villasante*

*Idazkariordea*

*J. L. Lizundia*